

TENY MAHAZO

Voampa sy voahorakoraka ny Filoha Rajoelina

Voaporofa ankehitriny fa tena tsy faly amin'ny mpitondra TGV ny vahoaka Malagasy, fa tahotra amin'ny fanamparan-pahefana ataon'ny mpitondra filaminana fotsiny no mitazona azy ireo tsy hitroatra. Vao ny talata lasa teo ny vahoaka tany Ambatolampy no nanao fihetsiketsehana manohitra ny fidangan'ny hetra alaina amin'ny mpandraharaha madinika any an-toerana raha tsy hilaza afa tsy izay fotsiny eto amin'ny gazety. Fa ny omaly dia henatra no nahazo ny mpitondra TGV, fa horakoraka sy siotsioka ary ompa no nahazo ny kaoritizin'ny fiara nitondra ny filoha Andry Rajoelina, raha nandalo



teny Mahazo iny. Midika izany fa ny vahoaka tsy miteny io anie, ka misy vainafo mahamay ny ao ampony ao, ka mety hipoaka amin'ny andro tsy ampoizina e! Nandritra ny herintaona nitondran'i Andry Rajoelina dia tsy nisy

zavatra mba nahafaly ny vahoaka no vitan'ity fitondrana ity ary tsy araka ny fampanantenana izay natao. Asaivo mamono afo hatrany ny seraseran'ny mpitondra ao mananjika ny olona tsy mitovy hevitra amin'ny fitondrana, fa

dia amin'ny tsy ampoizina no mety hisy zavatra hipoaka eto. Ny nahatonga ny fahatezeran'ny mponina teny Mahazo omaly dia noho ny fanesorana ireo mpivarotra amorondalana teny an-toerana, nefa tsy misy vaha-olana omen'ny fitondrana hamindrana azy ireo. Ankoatra izany, mazava ny tenin'ny filohan'ny RMDM, Marc Ravalomanana hoe : mba izay laharam-pahamehana ho an'ny vahoaka aloha no tokony himasoana fa ny rendra-rendra tsy mitondra mankaiza mila havela aloha. Izao ka afabaraka tateraka tamin'ny tsy nampoizina ny filoha Andry Rajoelina teny Mahazo.

Helisoa

Vinam-pampandrosoana

Tsy manana olona Rajoelina sy ny IEM

Fanatanterahana ny vinam-pampandrosoana, azo lazaina fa tsy nanana ary tsy manana olona ny fitondrana Andry Rajoelina, sy ny IEM. Izay no antony nikarohany sy nanaovany fiantsoana ireo manam-pahaizana, na eto amin'ny firenena, na monina any ivelany, izay hoe vonona hiara-hiasa aminy. Tamin'ny fampielezanan-kevitra ny fifidianana filohampirenena anefa dia toa ohatry ny efa vonona avokoa ny hanatanterahana ilay IEM, sy ny olona rehetra hanao izany. Momba izay fitadiavana olona manam-pahaizana nataon'ny fitondrana izay, voalaza fa miisa 7855

ireo malagasy mpiray tanindrazana nandefa ny mombamomba azy ireo, sy ny fari-pahaizany ary ny ezaka afaka hoentiny ho an'ny firenena. Sehapihariana maro no tonga namaly ny antso ary nampita izany tamin'ny alalan'ny tranokalam-pifandraisana teo anivon'ny Fiadidiana ny Governemanta. Raha arafitra hoy ny fanambarana dia toy izao ny fangatahana fiaraha-miasa voaray : Ambasadaoro, no hoe solontena maharitra any ivelany : 97 na 1,23% ; minisitry : 460 na 5,86% ; gavernoram-paritra : 243 na 3,09% ; Sekretera Jeneraly : 231 na 2,94% ; Tale

Jeneraly : 779 na 9,92% ; mpanindrina ankapobeny : 162 na 2,06% ; mpanolotsaina : 530 na 6,75% ; tale : 1642 na 20,82% ; Mpiandraiki-draharaha : 12 na 0,15%. Raha atotaly dia miisa toy izao ireo vonona ny ho mpisahan-draharaha ambony : 4156 ary mpitantana eo anivon'ny fanjakana : 3699. Ireo no ahazoana ny totaly 7855. Namaly ny antso nataon'ny fitondrana foibe avokoa ny teratany Malagasy, na avy eto an-toerana, na avy any Eoropa, Etazonia, Afrika, Kanada. Anjaran'ny kabinetra manokaana no miandraikitra ny fanadihadiana sy fandraisana ary

fandinihana ny antontan-taratasy rehetra voaray, no manohy ny asa. Miisa telo izy ireo : SGGROUP, Agile ary Coef Ressources. Ny fitondram-panjakana foibe kosa no hizaha sy hangataka araky ny filan'ny sampan-draharam-panjakana isan-tokony avy ireo manam-pahaizana Malagasy vonona hifanolotanana araka izay lamina nambanan'izy ireo tao anatin'ny famaliana ny tolotra ho amin'ny fitondram-panjakana ary manaiky ny rindran-damina napetraka sy voarikitra ao anatin'ny IEM.

Niaina

Fahefana mpanatanteraka

Tafajoro ny governemanta faha-3, Ntsay Christian

Tafajoro omaly teny amin'ny lapampanjakana lavoloha ny governemanta faha-3 an'ny Praiministra Ntsay Christian. Nisy ireo ministra vaovao niditra amin'izany governemanta izany, nisy koa ireo minisitra nijanona amin'ny toerany teo aloha ihany. Araka ny voalaza teo dia mijanona amin'ny toerany ihany ny lehiben'ny governemanta Ntsay Christian: -Ministry ny Fiarovam-pirenena : Général de Corps d'Armée Rakotonirina Léon Jean Richard. -Ministry ny Raharahambahiny : Pr Tehindrazanarivelo Jacob. -Mpitahiry ny Kasem-panjakana, Ministry ny Fitsarana : Jhonny Richard Andriamahafarivo. -Ministry ny Toekarena sy ny Vola : Richard Randriamandranto. -Ministry ny Atitany sy ny

Fanapariham-pahefana : Razafimahefa Tianarivelo. -Ministry ny Filaminambahoaka : Contrôleur Général de Police Randriarison Fanomezantsoa Rodlish. -Ministry ny Fanajariana sy ny Asa Vaventy : Andrianainarivelo Hajo. -Ministry ny Fanabeazam-pirenena, ny Fampianarana ara-teknika ary ny Fampiofanana arak'asa : Ramatoa Andriamiana Josoa Sambatra. -Ministry ny Fahasalamm-bahoaka : Pr Ahmad Ahmad. -Ministry ny Fambolena, ny Fiompiana ary ny Jono : Ranarivelo Fanomezantsoa Lucien. -Ministry ny Angôvo sy ny Akoranafo : Ramarolahy Christian. -Ministry ny Harena anki-bon'ny tany sy ny Loharanon-karena : Stratejika :

RAVOKATRA Fidiniavo. -Ministry ny Fitaterana, ny Fizahan-tany ary ny Famantarana ny Toetrandro : RANDRIAMANDRANTO Joël. -Ministry ny Asa, ny Fampananan'asa, ny Asampananjakana ary ny Lalàna Sôsialy : Ramatoa Ramampy Gisèle. -Ministry ny Fampianarana ambony, ny Fikarohana ara-tsiansa sy ny Fanavaozana : Pr Assomakoa Elia Béatrice. -Ministry ny Indostria, ny Varotra, sy ny Asa tanana : Ramatoa Rakotomalala Lantosoa. -Ministry ny Tontolo lainana sy ny Fampandrosoana Maharitra : Ramatoa Raharinirina Baomivavotsy Vahinala. -Ministry ny Paositra sy ny Fifandraisan-davitra ary ny Fampiroboroboana ny Haitao Ara-kajy Mirindra : Ramaherijaona An-

driamanohisoa. -Ministry ny Mponina sy ny Fiahiana ara-tsôsialy ary ny Fampivoarana ny Vehivavy : Ramatoa Naharimamy Lucien Irmah. -Ministry ny Tanora sy ny Fanatanjahantena : Raharoarilala Tinoka Roberto Michael. -Ministry ny Serasera sy ny Kolontsaina : Ramatoa Andriantongarivo Rakotondrazafy Lalatiana. -Minisiteran'ny rano, ny fahadiovana ary ny fidiovana : Ramatoa Rakotvelomanantsoa Voahary. -Minisitra lefitra misahana ny tanàna vaovao sy ny toeram-ponenana: Andriamatoa Zasy Angelo. -Sekreteram-panjakana eo anivon'ny Ministeran'ny Fiarovam-pirenena, miadidy ny Zandarimariam-pirenena : Général de Corps d'Armée RAVALOMANANA Richard. **Isambilo**

Ny Valosoa sy fakafaka

Iray volana tsy nahitana mangirana izay hihatsarany ny fiainam-bahoaka

Mamarana ny volana voalohany sahaday amin'ity taona vaovao ity isika ankehitriny. Iray volana nifamahofaho tamin'ny toe-javatra maro samihafa teto amin'ny firenena. Niseho izany tamin'ny sehatra politika, ny ara-tsôsialy ary ny ara-toekarena. Tsy hita ho nitondra soa ho an'ny vahoaka sy ny firenena anefa ireny rehetra ireny hatreto.

Teo amin'ny lafiny politika, dia niaraha-nahita ny zava-tsy manjary nitranga teo amin'ny fifidianana ben'ny tanàna. Niainga hatrany am-panomanana sy nandritry ny andron'ny fifidianana ary ny famoahana ny vokatra vonjimaika sy ny ofisialy. Nampihivivina ny olom-pirenena ny zava-nitranga tamin'ity farany. Mbola tantara mitohy ny amin'io raharaha io satria misy ny fampiakarana fitsarana ambony ny amin'izany. Hanao ahoana ihany koa ny valiny? Ho hita eo na ho hany hampitsiry ny fanantenana ho an'ny olom-pirenena vanona, na hampangidy fara ny resaka fifidianana eto amin'ity firenena ity, ka ho maizina ny ho avy sisa rehetra. Santionany amin'ny resaka politika eto amin'ny firenena io.

Mirazotra amin'ny olana ara-politika ny olana ara-toekarena. Ity fitondrana Rajoelina ity dia ambara mandrakariva fa mpamorona olana eto amin'ny firenena. Maro ny tranga toy izany, iray amin'ireny, ohatra, ny raharaha Ambohitrimanjaka, izay efa hita fa tsy mety izao, ary tsy fahendrena velively ny manatanteraka azy, dia mbola ikiriana ihany ho hatao. Efa nisy olona namoy ny ainy teny an-toerana noho ny alahelo be amin'izany fikasan'ny fitondrana izany, kanefa iniana ikimpiana sy odiana tsy hita sy tsy fantatra fotsiny izao izany. Izany ve no fitondrana mit-sinjo vahoaka? Izao indray dia omena vahiny ny tany midadasika any atsimo any. Ny raharaha "Bas-Mangoky" no tiana ho lazaina amin'izany. Tsy toy izany ihany ve no niampangana sy nanenjehan-dry Rajoelina sy forongony ny filoha Ravalomanana Marc tamin'ny fotoan'andro nanonganam-panjakana, kanefa tsy marina akory ary voaporofa ny tsy fahamarinan'izany henjikenjika ratsy izany taty aoriana kely fotsiny. Izao iaraha-mahita miharihary ny tena manao izany fivarotana tanindrazana izany ary manome vahana ny vahiny hahazo tany be velarana sy midadasika eto amin'ny firenena. Na inona fanazavana atao, tsotra ny an'ny mpandinika, omena vahiny tany. Santionany amin'ny olana eo amin'ny sehatra ara-toekarena ihany koa ireo.

Ny sehatra tena ipetrahan'ny olana goavana tateraka amin'izao fotoana izao dia ny ara-tsôsialy. Tsy misy afitsoka amin'ny vahaolana amin'io na kely aza hatreto ny fitondrana Rajoelina. Tsy mitsaha-miakabidy ny sakafo filan'ny mponina andavanandro, ary iainam-bahoaka izany na eo aza ny fandrebirebena amin'ny tarehimarika samihafa ilazana ny tsy fison-drotan'ny vidim-piainana. Tsy misy fiovàny sy tsy misy fihatsarany ny fiainam-bahoaka. Vao mainka miha-gorobaka ny kitapom-bolan'ny isan-tokantrano hikaohana andro aman'alina izay hany potipotiny sisa tavela amin'izay mba notadiavina raha misy. Tsy manana politika mazava sy hentitra hanarenana maika izany olam-bahoaka izany ny fitondrana. Toa vao mainka aza hatao hatrany izay hahafrika ny vahoaka toy ny natao tany Ambatolampy, ka notoherin'ny mponina. Ity fitondrana ity ihany no mamorona olana eto amin'ny firenena. Hiditra amin'ny volana faharoa isika, tsy mbola ato ho ato akory no hivan'izany olana rehetra izany, sy izay tsy voatanisa, ary inoana fa tsy maintsy mbola hisy olana vaovao hafa indray hipoitra ao aoriana kely, tsy ho ela eo.

Sôh'son

PRIERE AU SACRE CŒUR



Que le Sacré Cœur de Jésus soit loué, adoré et glorifié à travers le monde pour des siècles et des siècles, Amen.

Dites cette prière 6 fois/ jour pendant 9 jours et vos prières seront exaucées même si cela semble impossible. N'oubliez pas de remercier le Sacré Cœur avec promesse de publication quand la faveur sera obtenue. Remerciements au Sacré Cœur pour faveurs obtenues.

Mioty R